

Monday, May 18, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

INTERNATIONAL MUSEUM DAY

Mizoram State Museum chuan khawvel hmun dangte rualin vawiin khan International Museum Day 2026 an hmang a.

Akashvani News Aizawl zawhna chhangin, Mizoram State Museum Curator Pu C. Lalruatfela chuan, Museum chu zirna in pawimawh a ni a, hmuh theih, khawih theih leh chhiar theih a mipuite hnena zirtirna pe theitu a ni a ti a, hmanlai pi leh pu te leh tunlai mite min thlun zawmtu pawimawh tak a ni tih a sawi bawk a ni.

Mizoram State Museum-ah hian Gallery paruk - Zoology, History, Anthropology, Ethnology, Textile leh Archelogy te a awm mek a. Museum thawktute chuan, Mizo ten Museum ngaihhlut nachang an hriat zual a pawimawh a, state pawn leh ram pawn atanga Mizoram rawn tlawhtute chuan Museum chu an tlawh duh hle tih an sawi a ni.

International Museum Day pual hian Mizoram chhunga Special School hrang hrangte chu State Museum tlawh tur hian sawm an ni a, anni bakah hian tualchhung mi leh hnam dang tlawhtu pawh an awm nual a ni.

Ephatha Special School, College Veng a an Principal Pu Samuel R. Lalmangaiha chuan, naupang bengngawng tawng thei lo an enkawl ten hmanlai Mizo thil leh nunphung a taka a hmu thei chu a lawmawmin a hlu hle tih a sawi a ni.

Kumin International Museum Day thupui chu "Museum: Khawvel inthenhrangte inpumkhatna" (Museum Uniting a divided world) tih a ni.



UNION Mos

Mizoram tlawha lo zin mek Union Minister of State Pi Nimuben Jayantibhai Bambhaniya in Mizoram mipuiten eikhawp hnianghnar an neih reng theih nan theihtawp an chhuah dawn tih a sawi.

Nizan khan Food, Civil Supplies & Consumer Affairs Department chuan Aijal Club-ah Union Minister pual hian Inkawmhona leh Zanriah an buatsaih a. Pi Nimuben Jayantibhai Bambhaniya chuan Mizoram in GI tag nei tawh Mizo Sawhthing leh Mizo Hmarcha mai bakah khawvel hriat khawpa hmingthang engemaw zat a neih thu a sawi a; Mizoramin harsatna a neihte zira, a tul anga chingfel tura zin anih thu a sawi.

Pi Nimuben chuan sawrkar in chhung tin intodelh a ngai pawimawh tih sawiin hmarchhak bialah fur ruahtui a tlak nasat avangin Ration pek lawk annih theih nan tanpui a inhuam thu a sawi a, mi tinin eikhawp hnianghnar tak an dawn theih nan sawrkarin theihtawp a chhuah tih a sawi.

Nizana inkawmna ah hian Mizoram sawrkar Supply Minister Pu B. Lalchhanzova bakah sawrkar mi pawimawh hrang hrang ten thu an sawi a ni.

Nimin khan Chief Minister Pu Lalduhoma leh Pi Nimuben Jayantibhai Bambhaniya te hi an inkawm a, Mizoram tana buhfai chawk luhna tam zawk leh awlsam neih theih dan tur chungchang an sawi dun a.

Chief Minister Bangla-a inkawmna ah hian Chief Minister chuan Union Minister of State Pi Nimuben Jayantibhai Bambhaniya Mizoram tlawha a rawn zin avangin lawmthu a hrilh a, Open Market Sales Scheme (OMSS) hnuaia buhfai tam zawk lei phalsak chungchang leh OMSS atanga lei a rem loh pawha Bharat Rice atanga lei phalsak bakah NFSA Mizoram rice allocation Quota tihpun chungchang leh Central sector scheme awm thin, 'Storage & Godown' tihnun thar chungchang an sawi dun a, Union Minister hian Chief Minister thusawite chu a lo bawhzui tur thu a sawi a. Mizoram chu mawi a tih thu leh nuam a tih thu Chief Minister hnenah hian a sawi bawk.



PM

Prime Minister Narendra Modi an Norway khawpui Oslo a thleng a, Norway a tlawh vawi 1 na niin kum 43 hnua India Prime Minister in he ram a tlawh lehna hmasaber a ni.

Vawiin hian Norway lal- King Harald V leh lalnu Queen Sonja te a kawm anga, Prime Minister Jonas Gahr Støre nen pawh ram pahnih inlaichinna chungchang an sawidun ang.

India-Norway Business and Research Summit –ah Pu Modi a hian thu a sawi anga, 3rd India – Nordic Summit pawh naktukah a chhim bawk ang.

